

Hordaland fylkeskommune
Postboks 7900

5020 BERGEN

Adm.enhet: Tildelingsseksjonen
Sakshandsamar: Elise Bølgen
Telefon:
Vår referanse: 17/5667
Dykkar referanse:
Dato: 06.10.2017

Att:
Roy Dahle

Hordaland Fylkeskommune ved Austevoll Vidaregåande Skule - Tilsegn om utviding av undervisningsløyve til akvakultur med laks, aure og regnbogeaure til undervisningsføremål

Vi viser til Dykkar søknad motteke her den 11. april 2017, kor det vert søkt om utvida undervisningsløyve for oppdrett av laks og regnbogeaure, frå MTB 130 tonn til MTB 780 tonn.

Søkjjar har sendt inn kvittering for betalt saksbehandlingsgebyr på kroner 12.000,-.

1. Søknaden

1.1 Innleiing

Hordaland fylkeskommune ved Austevoll Vidaregåande skule (heretter Austevoll vgs/skulen), søkjer om utvida undervisningsløyve for oppdrett av laks og regnbogeaure, frå MTB 130 tonn til MTB 780 tonn. Det opphavelige undervisningsløyvet (HAV0065) vart utstedt av Fiskeridirektoratet den 12.02.2002.

Dersom løyve vert gjeve, skal Lerøy Vest AS (heretter Lerøy Vest) drifte denne i 10 år etter avtale med skulen. Etter avtalen får alle elevar utplassering ved Lerøy Sjøtroll, samt gjennomført alle læreplanmåla i løpet av utdanninga. Skulen vil også få tilgang til heile verdikjeda i Lerøy Seafood Group ASA.

Det går fram av innsendt søknad at undervisningsløyve vert søkt knyta til Lerøy Vest sine matfisklokalitetar 25 835 Flatøyflu og 24 975 Kvernavik. Desse to anlegga er lokalisert i to ulike brakkleggingssonar, og det går fram av søknaden at det alltid vil vere

fisk tilgjengelig på ein av lokalitetane. Vidare er det opplyst om at lokaliteten 11 488 Brattavika skal strykast.

1.2 Om Austevoll Vidaregåande skule

Det følgjer av innsendt fylgjeskriv at Austevoll vgs er ein maritim skule som tilbyr utdanning innan fiskeri, akvakultur, maritime fag, matros og motormann. Skulen er ein av to skular i Hordaland som tilbyr Vg2 akvakultur. Skulen har per 2017 om lag 140 elevar, og ligg i Austevoll kommune.

Austevoll vgs er lokalisert ved sjøen på austsida av Huftarøy. Det er opplyst at dei tenkte undervisningslokalitetane ligg i kort avstand med båt:

«Eit viktig moment for å vurdere eit samarbeid med ei verksemd er undervisningslokaliteten sin nærleik til skulen og at den er tilrettelagt undervisning, samt at lokaliteten har moderne utstyr. Den omsøkte undervisningskonsesjonen vil vere tilknytt LS sine anlegg Flatøyflu og Kvernavik, som berre ligg 8 km frå Austevoll VGS. Med ein snittfart på 10 knop er berekna reisetid på 30 minutt.»

Om utdanningstilbodet vert det mellom anna opplyst om at:

«Innanfor utdanningsprogrammet for Naturbruk kan ein ved Austevoll VGS gjennomføre programområdet Naturbruk i første skuleår (Vg1), mens i andre skuleår (Vg2) kan ein velje mellom programområda Akvakultur eller Fiske & Fangst. Etter ferdig Vg2 Akvakultur kan elevane fortsetje vidare som lærling i bedrift over 2 år (Vg3 Akvakulturfaget), som vil gi eit fagbrev og ein er kvalifisert til å arbeide som fagoperatør i akvakultur. Skulen tilbyr teknisk fagskule Akvakultur etter ferdig fagbrev for dei som ynskjer å verte betre kvalifisert til mellomleiarstillingar innan havbruk. Det finst fleire vegar for å gå vidare på høgare utdanning. Enkelte studieliner ved høgskular/universitet krev berre fagbrev (Y-veien), mens ved andre må ein gjennomføre Vg3 påbygging til generell studiekompetanse eller studieførebuande Vg3 naturbruk.»

Under overskrifta 'Tal på elevar' i følgjeskrivet er det vist til at det alltid har vore ei god søknadsmasse til naturbruk (Vg1) ved skulen, og at skulen på landsbasis har vore ein av dei største blå naturbruksskulane. Det er vist til at skuleåret 08/09 hadde svake søkjertal til Naturbruk, noko som har tatt seg opp igjen dei seinare åra. I dei tre siste åra har det vore 10, 13 og 17 elevar ved akvakulturlina.

I følgjeskrivet under overskrifta 'Kvifor er det trong for ein undervisningskonsesjon' er det gjeve ei utgreiing av læreplanmål som er retta mot akvakultur, og det vert framheva at eit undervisningsløyve vil ha stor tyding for kvaliteten på skuletilbodet og rekrutteringa til havbruksrelaterte yrke. Det er i søknaden vist til at ei utviding av løyve frå MTB 130 til MTB 780 vil gi elevane eit direkte innblikk i kommersiell produksjon og dermed blir undervisningen basert på reelle arbeidsforhold i bransjen: *«Ei utviding av undervisningskonsesjonen til MTB 780 t vil sikra at verksemda retter drifta meir mot undervisning enn det til no har vore ynskjeleg å gjennomføre med dagens konsesjon på 130 t. For at skulen skal ha moglegheit til å drive samlokalisert med ein aktør er det derfor naudsynt at*

storleiken på konsesjonen er tilsvarende lik storleiken til ein ordinær merd for å standardisere og effektivisere drifta.», jf. punkt 3.5 i føljeskrivet.

1.3 Om samarbeidspartnar Lerøy Vest

Elevane ved skulen vil få utplassering ved Lerøy Sjøtroll, og ettersom Lerøy Sjøtroll er ein del av Lerøy Seafood Group ASA vil elevane derfor få tilgang til heile prosessen frå stamfisk, rogn, setjefisk, matfisk, slakt/foredling og marknad. Hovudaktiviteten vert på Flatøyflu, som ligg i brakkleggingssone haust partal og alternativ aktivitet på lokalitet Kvernavik som ligg i haust oddetal sone.

1.4 Bruk av løyvet i utdanninga

Det går fram at målet med avtala er å etablere eit breiare praksissamarbeid særleg retta mot havbruksnæringa, og at ein ønsker å bidra til kompetansebygging for næringa ved å bidra til Austevoll vgs sitt undervisningstilbod. Avtalen skal mellom anna sikre at skulen sine elevar som skal ut i praksis får gjennomført og godkjent praksis i tråd med praksisplan for Akvakultur.

Inntektene frå utleige av løyvet skal nyttast til å bygge opp eit undervisningsfond eigd av Hordaland Fylkeskommune. Føremålet med fondet skal vere å finansiere, heilt eller delvis, undervisningsprosjekt, rekrutteringsprosjekt eller tiltak som skuleeigar åleine eller saman med næringa, Lerøy Vest eller andre, ønskjer å gjennomføre for å styrke dei blå faga i vidaregåande opplæring ved Austevoll vgs.

1.5 Avtalen mellom Hordaland fylkeskommune og Lerøy Vest

1.5.1 Om avtalen

Vedlagt søknad er signert avtale mellom Hordaland fylkeskommune ved Austevoll vgs og Lerøy Vest, om «*samarbeid innan undervisning for akvakulturnæringa og i denne samanheng utleige og operativ drift av undervisningsløyve for oppdrett av laksefisk*». Avtalen vart underteikna 10. mars 2017.

Føremålet med avtalen er mellom anna å sikre at både den teoretiske og praktiske opplæringa i havbruksfaga ved skulen vert av betre kvalitet, og endå betre planlagt og gjennomført i tråd med kunnskapsløftet og læreplanane sine intensjonar og mål. Avtala skal sikre «*sterkare band og betre samarbeid mellom Skule og næringsliv, som igjen fører til endå betre samsvar mellom næringa sine behov og den måten undervisninga til ei kvar tid føregår på.*» Vidare følgjer det at:

«Avtala og samarbeidet skal sikre at skulen sine elevar som skal ut i praksis får gjennomført og godkjent praksis i tråd med praksisplan for Akvakultur. Framstilling i søknad om Løyve skal danne eit rammeverk for organisering av samarbeid rundt praksisopphald på lokalitetane til Oppdrettar.»

Punkt 3 i avtalen gjeld etablering og drift av samarbeidet, og det følgjer under punkt 3.1 om 'Utleie av løyve' at føresetnaden for utleige av løyve er at elevane ved skulen får tilgang til

praksisplassar hos oppdrettar, på nærare definerte lokalitetar der løyve vert driven. Vidare følgjer det mellom anna under punkt 3.2 om 'Partane sine plikter ved oppstart av samarbeidet':

« a) Oppdrettar skal planlegge, finansiere og sette i verk utbygging/tilpassing av anlegget til Løyve innafor rammene av tildelinga, og elles sørge for det som er nødvendig for at Løyve kjem i operativ drift innan 3 månader etter at konsesjonen er innvilga.

d) Oppdrettar skal gjere alle nødvendige førebuingar for å drifte Konsesjonen til beste for Partane, og til oppfylling av formåla med denne Avtala. Oppdrettar skal sette opp nødvendige dagleg leing og koordinering i anlegga der Konsesjonen blir plassert.

i) Skulen skal medverke til at anlegg og lokalitetar blir klargjort for operativ drift innan tidsfristen, og i den forbindelse gi all praktisk bistand som er naudsynt. Det vil vere faglærer for vg2 akvakultur som er ansvarleg for dette på vegne av Skulen. Ev. kan skulen sine lokale brukast til undervisning.

j) Skulen skal utarbeide ein årsplan/undervisningsplan som viser korleis lokalitetane skal takast i bruk av skulen det første skuleåret, og sende denne til Oppdrettar innan utgangen av mai.»

Vidare går det mellom anna fram under punkt 3.3 bokstav a) om 'Partane sine plikter før oppstart av kvart skuleår' at: «Skulen skal før kvart skuleår utarbeide ein årsplan/undervisningsplan som viser korleis lokalitetane skal takast i bruk av Skulen, og samtidig rapportere kor mange elevar ein reknar med neste skuleår. Utkast til årsplan skal sendast Oppdrettar ved skulestart. Ein slik undervisningsplan er likevel ikkje bindande og Oppdrettar må rekne med å ta imot praksiselevar utanom dei oppsette vekene i skuleåret.»

I punkt 5 om 'Økonomi – undervisningsfond' går det fram at leigeinntektene skal nyttast til å bygge opp eit undervisningsfond eigd av Hordaland Fylkeskommune. Føremålet med fondet skal vere å finansiere, heilt eller delvis, undervisningsprosjekt, rekrutteringsprosjekt eller tiltak som skuleeigar åleine eller saman med næringa, oppdrettar eller andre, ønskjer å gjennomføre for å styrke dei blå faga i vidaregåande opplæring ved Austevoll vgs. Desse prosjekta eller tiltaka kjem i tillegg til ordinær drift på skulen.

Dei økonomiske sidene av leigetilhøva vert regulert i særskilt vedlegg til avtala. Av vedlegg til avtala går det fram at leiga for undervisningskonsesjonen er samansett av to ulike element: fast årleg leige og variabel leige.

2. Fiskeridirektoratet si vurdering

2.1 Fiskeridirektoratet si vurdering av dispensasjon frå utleigeforbodet

Det følgjer av akvakulturlova § 19 tredje ledd at «[u]tleie av akvakultur ikkje er tillatt.

Departementet kan i særleg tilfeller gjøre unntak fra forbudet mot utleie». Det går ikkje utrykkeleg fram av søknaden at det vert søkt om dispensasjon i frå utleigeforbodet, men på bakgrunn av søknaden og den foreslåtte drifta av løyvet, legg Fiskeridirektoratet til grunn at Hordaland fylkeskommune søkjer om dispensasjon i frå utleigeforbodet.

Heimelen til å gje dispensasjon frå utleigeforbodet er delegert til Fiskeridirektoratet, jf. brev datert 19. desember 2007. Det følgjer av forarbeida i Ot.prp.nr.61 (2004-2005) på side 26 og 71, at føremålet med utleigeforbodet er å sikre at det er eigar av akvakulturløyvet som faktisk driver akvakulturverksemda.

Det er klart at avtalen mellom Hordaland fylkeskommune og Lerøy Vest AS er ei avtale om utleige av eit eventuelt løyve til akvakultur med matfisk av laks, aure og regnbogeare til undervisningsføremål.

Spørsmålet er som dette er eit særleg tilfelle som grunnleggjer ein dispensasjon frå forbodet mot utleige i akvakulturlova § 19.

I Ot.prp.nr.61 (2004-2005) om lov om akvakultur, går det fram på side 71 at «*Dette er en snever adgang som bare kan benyttes i tilfeller hvor hensynene bak forbudet ikke forfeiles selv om leie tillates. Med særlige tilfeller menes at det må foreligge kvalifiserte grunner for å gjøre unntak.*»

I sak 14/174 (Fræna vidaregåande) ble det vektlagt at det var positivt at skulen ville starte opp med eigen linje VG2 Akvakultur, og at anslått elevtall virka realistisk og oppnåeleg. Det ble også vist til samarbeidsselskap for drift av løyvet, som etter søkars syn ville gi elevane eit best mogleg undervisningstilbod og innsikt i reelle arbeidsforhold og akvakulturnæringa. Basert på dette fant Fiskeridirektoratet at det var kvalifiserte grunnar for å dispensera frå akvakulturlova § 19 tredje ledd. Dette vart også resultatet i sak 16/5866 (Måløy vidaregåande skule), kor det vart lagt vekt på at eit meir attraktivt opplegg for marin utdanning ville bidra til å auke søknadstala ved skulen, og at avtala med samarbeidspartnaren ville sikre ei tidsriktig og god utdanning.

I denne saka er det også tale om ein vidaregåande skule som tilbyr utdanning innan akvakultur. Det er framheva i søknaden at elevtalet ved skulen si akvakulturline har vore låg og varierende, og eit undervisningsløyve av storleika som omsøkt vil føre til ei meir praktisk-retta undervisning, kor elevane vil føle at opplæringa vert meir attraktiv, motiverande og realistisk. Søkjar meiner at det er naudsynt å samarbeide med ei oppdrettsbedrift for å kunne møte myndigheitene sine krav til teknologi, kompetanse og administrasjon av undervisningsløyvet.

Fiskeridirektoratet legg til grunn at Lerøy Vest etter avtalen gir elevar ved skulen praksisplass ved LS, og at elevane får gjennomført alle læreplanmåla i løpet av utdanninga. I følgeskrivet punkt 3.8 er det gjeve ei oppstilling av korleis undervisningsplaner innan Naturbruk (Vg1) og Akvakultur (Vg2) kan sjå ut. Desse undervisningsplanane er per i dag ikkje fastsatt, men gjev eit bilete av korleis elevane sin undervisning vert meir praktisk-retta og at rekrutteringsarbeidet til næringa vert

målretta, noko som tilseier at føremålet med undervisningløyve vert ivaretatt sjølv om det vert utleigd.

Fiskeridirektoratet er på denne bakgrunn, og i tråd med praksis, kome til at dette er eit særleg tilfelle som grunnleggjer ein dispensasjon frå forbodet mot utleige i akvakulturlova § 19.

2.2 Fiskeridirektoratet si vurdering av søknaden

2.2.1 Gjeldande regelverk

Føremålet bak forskrifta om løyve til akvakultur for laks, aure og regnbogeare (laksetildelingsforskrifta) er å *«medvirke til at akvakultur av laks, ørret og regnbueørret blir lønnsom og konkurransedyktig innanfor rammene av en bærekraftig utvikling, og bidra til verdiskaping på kysten»*, jf. laksetildelingsforskrifta § 1.

Når det gjeldt dei særskilte løyva til akvakultur av matfisk, er det lista opp særlege føremål i laksetildelingsforskrifta § 22, kor det følgjer av femte ledd at: *«Akvakultur av matfisk til undervisning skal bidra til at undervisningsinstitusjonene skal kunne tilby attraktiv, realistisk og kvalitativ god undervisning i praktisk akvakultur og akvakulturregelverk og derigjennom bidra til rekruttering av personell med relevant kompetanse til akvakulturnæringen.»*

I laksetildelingsforskrifta § 26 er det gitt særskilde tildelingsvilkår for løyve til undervisning:

«Tillatelse kan gis til utdanningsinstitusjon på universitet- eller høyskolenivå, til fylkeskommune for bruk i videregående skole eller til privat skole som har eller planlegger et undervisningstilbud hvor akvakultur inngår.»

Tillatelse kan bare gis videregående skole eller privat skole som vil tilby elever et undervisningsopplegg som er godkjent av departementet, og som fører fram til et tilbud om fagbrev ved skolen.»

Vidare følgjer det av laksetildelingsforskrifta § 28b første ledd at maksimal tillat biomasse til særlege føremål skal fastsettast etter ein konkret vurdering, kor det mellom anna skal takast omsyn til søkaren sitt behov. Maksimal tillat biomasse per løyve skal ikkje overstige 780 tonn. Når det gjeld løyve til undervisning *«skal det blant annet tas hensyn til det planlagte driftsopplegget»*

Endeleg følgjer det av laksetildelingsforskrifta § 23 første ledd at løyve til undervisningsføremål vert gjeve mellombels med inntil 10 år av gongen. Det er høve å søkje om forlenging. Regelen om tidsavgrensing vart tatt inn i forskrifta med verknad frå 01.01.2010.

2.2.2 Vurdering

Det ligg føre søknad om utviding av undervisningsløyve i frå 130 tonn MTB til 780 tonn MTB. I søknaden punkt 3.5 under overskrifta 'Kvifor ei utviding av dagens konsesjon?' er det mellom anna vist til at:

«Ei utviding av eksisterande løyve frå MTB 130 t til MTB 780 t gjev elevane eit direkte innblikk kommersiell produksjon og dermed ei undervisning basert på reelle arbeidsforhold i bransjen. Omstende som t.d. åtferd, miljøforhold, føring, teknologi og andre arbeidsoperasjonar vil vere vesentleg forskjellig i småskala versus storskala drift.

Ei utviding av undervisningskonsesjonen til MTB 780 t vil sikra at verksemda retter drifta meir mot undervisning enn det til no har vore ynskjeleg å gjennomføre med dagens konsesjon på 130 t. For at skulen skal ha moglegheit til å drive samlokalisert med ein aktør er det derfor naudsynt at storleiken på konsesjonen er tilsvarende lik storleiken til ein ordinær merd for å standardisere og effektivisere drifta.»

Det følger av laksetildelingsforskrifta § 28b første ledd at maksimal tillat biomasse til særlege føremål skal fastsettast etter ein konkret vurdering, kor det mellom anna skal takast omsyn til søkaren sitt behov. Maksimal tillat biomasse per løyve skal ikkje overstige 780 tonn. Når det gjeld løyve til undervisning «skal det blant annet tas hensyn til det planlagte driftsopplegget», jf. laksetildelingsforskrifta § 28b tredje ledd.

I Fiskeridirektoratet sin praksis er det lagt til grunn at kravet i laksetildelingsforskrifta § 26 andre ledd, om at undervisningstilbodet må føre fram til eit tilbod om fagbrev ved skulen, også inkluderer eit undervisningsopplegg med to års skule i bedrift, der eleven går opp til fagprøve i bedrifta, jf. mellom anna sak 15/1684 (Sortland vgs)

Austevoll vgs tilbyr Vg1 Naturbruk og Vg2 Akvakultur. Etter ferdig Vg2 Akvakultur kan elevane forsetje vidare som læring i bedrift over 2 år (Vg3 Akvakulturfaget), som vil gje eit fagbrev og som gjer elevane kvalifisert til å arbeide som fagoperatør i akvakultur. Skulen tilbyr også teknisk fagskule Akvakultur etter ferdig fagbrev for dei som ønskjer å vere betre kvalifisert til mellomstillingar innan havbruk. Skulen oppfyller med dette vilkåret om å tilby eit undervisningstilbod som er godkjent av departementet, jf. laksetildelingsforskrifta § 26 andre ledd.

Det er i søknadens punkt 3.3 vist til at eit undervisningsløyve av denne storleika vil ha stor tyding for kvaliteten på skuletilbodet og rekrutteringa til havbruksrelaterte yrke: *«Læreplanen i Naturbruk (Vg1) og Akvakultur (Vg2) inneheld mange praktiske læreplanmål (sjå eigne avsnitt om Vg1 Naturbruk og Vg2 Akvakultur), og desse krev at ein har ein eigen undervisningskonsesjon. Ved å knyte dei meir teoretiske læreplanmåla til den praktiske undervisninga vil dette auke læringsutbytte hos elevane. Ved at skulen har eit eige undervisningsløyve vil ein oppnå eit eigarforhold, som til saman vil føre til at undervisninga vil kjennas meir nyttig, realistisk og motiverande.»*

Samarbeidsavtalen med Lerøy Vest inneber at oppdrettar skal bidra med relevant opplæring av elevar på sine anlegg. I tillegg til dette skal oppdrettar betale ei årleg leige, som består av ei fast årleg sum og ei variabel årleg leige basert på fortjeneste. Inntektene frå utleige av konsesjonen skal gå inn på eit fond, som skal jobbe nettopp med å utvikle skulen sitt tilbod innanfor dei marine faga for å gjere det attraktivt for ungdomen.

Fiskeridirektoratet legg vekt på at både søknaden og avtalen med oppdrettar er gjennomarbeida, og at det berande omsynet synast å vere elevane og ønsket om å styrke utdanningstilbodet for å auke rekrutteringa, jf. føremålet med løyvet i laksetildelingsforskrifta § 22 femte ledd. Tiltaket fremmer derfor formålet om å *«medvirke til at akvakultur av laks, ørret og regnbueørret blir lønnsom og konkurransekraftig innanfor rammene av en bærekraftig utvikling, og bidra til verdiskaping på kysten»*, jf. laksetildelingsforskrifta § 1.

Fiskeridirektoratet vil at det skal vere attraktivt å samarbeide med skuler, for å auke rekruttering av kvalifisert personell og utvikle den berekraftige næringa som akvakulturnæringa er, jf. også tidlegare vedtak om tilsegn om utdanningsløyve. Saman med omsynet til at undervisningsløyvet skal passe inn i industrialisert drift, taler dette for å tildele eit fullt løyve med 780 tonn maksimalt tillat biomasse.

Fiskeridirektoratet finner etter dette at søknaden frå Hordaland fylkeskommune oppfyller vilkåra til utvida undervisningsløyve for oppdrett av laks, aure og regnbogeaure, frå MTB 130 tonn til MTB 780 tonn.

2.2.3 Tidsavgrensing

I følgje laksetildelingsforskrifta § 23 første ledd at løyve til undervisningsføremål vert gjeve mellombels med inntil 10 år av gongen. Det er høve å søkje om forlenging. Regelen om tidsavgrensing vart tatt inn i forskrifta med verknad frå 01.01.2010.

Det er per i dag ingen tidsavgrensing på undervisningsløyve (HAV0065) som vart gjeve den 12.02.2002.

Føremålet med ordninga med undervisningsløyve er å bidra til at undervisningsinstitusjonane skal kunne tilby attraktiv, realistisk og kvalitativ god undervisning i praktisk akvakultur og akvakulturregelverk. For å sikre at undervisningsløyve vert drifta i tråd med dette føremålet er det, etter Fiskeridirektoratets syn, naudsynt med revurderingar av løyvet.

Ettersom søkjar oppnår ein betydeleg utviding av løyvet, samt at tidsavgrensinga er den same som vert sett ved tildeling av nye løyver, har Fiskeridirektoratet satt vilkår om tidsavgrensing av løyvet på inntil 10 år, jf. laksetildelingsforskrifta § 23.

3. Vedtak

Med heimel i laksetildelingsforskrifta §§ 26, 22 femte ledd og 28b, vert Hordaland fylkeskommune gjeve tilsegn om utviding av undervisningsløyve for akvakultur av matfisk av laks, aure og regnbogeaure frå 130 tonn MTB til inntil 780 tonn MTB.

Løyvet gjeld for ti år frå det ligg føre nytt løyvedokument frå fylkeskommunen, jf. laksetildelingsforskrifta § 23.

Hordaland fylkeskommune vert gjeve dispensasjon frå forbod mot utleige i akvakulturlova § 19 tredje ledd, for å kunne leige ut undervisningsløyvet til Lerøy Vest AS.

Dispensasjonen er gjeve under føresetnad av gyldig, underteikna avtale i samsvar med avtale mellom Hordaland fylkeskommune og Lerøy Vest AS av 10. mars 2017.

Dispensasjonen faller bort utan vedtak dersom avtalevilkår vert endra. Eventuelt må det søkjast om ny dispensasjon før endring av avtalevilkåra.

Løyvet vert gjeve under føresetnad om naudsynt lokalitetsklarering i Hordaland fylke.

I tillegg til lov 2005-06-07 om akvakultur med tilhøyrande forskrifter skal følgjande særlege vilkår overhaldast:

- Løyvet skal brukast til akvakultur av matfisk til undervisning i samsvar med søknaden.
- Det skal årleg og innan utgangen av februar kvart år fyllast ut rapportskjema for akvakulturløyve til undervisning som sendast til Fiskeridirektoratet, Kyst- og havbruksavdelinga. Skjema finnast på Fiskeridirektoratet sine heimesider: <http://www.fiskeridir.no/Akvakultur/Registre-og-skjema/Skjema-akvakultur/Rapportering>

Ved brot på føresetnadene for, og vilkåra, i løyvet, eller ved passivitet, kan Fiskeridirektoratet trekke løyvet tilbake, jf. akvakulturlova § 9 og laksetildelingsforskrifta § 38.

Dette undervisningsløyvet er eit særøyve gitt Hordaland fylkeskommune, og kan for samarbeidspartnars del ikkje inngå i felles biomassetak, jf. laksetildelingsforskrifta § 33 og akvakulturdriftsforskrifta §§ 48 og 48a.

4. Bruk av settefylkeskommune og vidare saksgang.

Tilsegn om nytt undervisningsløyve gitt frå Fiskeridirektoratet er første trinn i søknadshandsaminga. Søknad om lokalitetsklarering skal handsamast i fylkeskommunen. Av habilitetsomsyn i sakshandsaminga oppnemnar

Fiskeridirektoratet med dette Sogn og Fjordane fylkeskommune ved handsaming av søknad om lokalitetsklarering i denne saka.

Fiskeridirektoratet sendar saka vidare til Sogn og Fjordane settefylkeskommune, som har ansvar for å handsame søknader om lokalitetsklaring vidare i samsvar med laksetildelingsforskrifta § 8 første ledd.

5. Klagerett

Vedtaket kan klagast på, sjå vedlagte orientering. Klagefristen er tre veker, jf. forvaltningslova § 29.

Med helsing

Anne B. Osland
seksjonssjef

Elise Bølgen
rådgiver

Brevet er godkjent elektronisk og vert sendt utan handskriven underskrift

Mottakarliste:

Hordaland fylkeskommune	Postboks 7900	5020	BERGEN
-------------------------	---------------	------	--------

Kopi til:

Fiskeridirektoratet Region Vest	Postboks 185	5804	BERGEN
---------------------------------	--------------	------	--------

Sentrum

Sogn og Fjordane fylkeskommune	Askedalen 2	6863	LEIKANGER
--------------------------------	-------------	------	-----------

Vedlegg

Klageskjema